



# Parc Adula Participaziun

## M E S S A D I

dalla suprastanza communal a al cussegl da vischnaunca


Preziau signur president  
Preziadas signuras cusseglieras  
Preziai signurs cussegliers

Finalmein suenter grondas e pretensiuns preparativas decida il suveran dallas 17 vischnauncas pertuccadas davart il project dil parc naziunal Parc Adula. La vischnaunca Mustér fa parzialmein part alla zona circumdonta dil parc. Perencunter ein las vischnauncas Medel, Sumvitg, Vrin, Val S. Pieder, Val Rein, Rossa, Mesauc, Blegn, Acquarossa, Seravalle, Calanca ein part dalla zona centrala.

## Liunga fasa da preparaziun

Gia dapi 16 onns vegn discutau sur dil Parc Adula. En quei interval ha la confederaziun investau denter otg e diesch milliuns francs en favur dallas regiuns periferas dil Grischun e Tessin. Suenter quella liunga fasa da preparaziun cun numerusas occurrenz d'informaziun e discussiuns decidan la fin november 2016 las 17 vischnauncas dallas regiuns Surselva, Blegn, Calanca, Mesolcina e Viamala davart l'appartenenza al Parc Adula.

Dapi l'entschatta october 2016 ei la versiun finala dalla Charta Parc Adula avon maun. Quei document che cuntegn il contract dil Parc Adula, ils statuts dall'Uniun Parc Adula, il reglament d'utilisaziun dalla zona centrala sco era il plan da management fuorma la basa per l'entira fasa da menaschi da diesch onns. Ella survecha als purtaders per la gestiun dil parc e lubescha a cantun e confederaziun il giudicament en consideraziuns dalla surdada dall'etichetta da parc e dad ina promoziun pusseviva. Ord la charta duei resortir, tgei che caracterisescha quei territori dil parc potenzial tut specialmein e pertgei ch'el mereta la renconuschientscha entras la confederaziun sco parc da muntada naziunala e duei obtener il sustegn finanziel giavischau. Dalla charta cun tuts documents e plans aschuntai sa vegnir priu investa sin la pagina d'internet [www.parcadula.ch/charta](http://www.parcadula.ch/charta).



La vischnaunca da Mustér ei cumpigliada al Parc Adula sulettamein ella zona circumdonta. Tenor confirmaziun da cussegliera federala Doris Leuthard dat ei neginas novas restricziuns en quella zona che cumpeglia totalmein 1'108 km<sup>2</sup>. Auter se presenta la situaziun ella zona centrala cun ina surfatscha da 142 km<sup>2</sup>. Per che las finamiras il Parc Adula sappien vegnir contonschidas ein las restricziuns per la zona entrala vegnidas formuladas en in reglament d'utilisaziun. Las reglamentaziuns specialas pertuccan sendas e rutas dil parc, il carrar cun vehichels sco era sgols cun helicopter, l'utilisaziun agricola, pesca e catscha sco era rimnar crappa e minerals, fossils, plontas e bulius.

Il messadi aschuntau dall'Uniun Parc Adula informescha detagliadamein davart il project pil parc naziunal. Ord quei motiv desistin nus da repeter ils fatgs numnai en quella brochura d'informaziun.

## **Ponderaziuns**

En nossa regiun muntagnarda havein nus da sbatter cun problems demografics e nus savein buca concorrenzar economicamein culs centers industrials giu la Bassa. Ord quei motiv valetescha la suprastanza communal il Parc Adula sco buna schanza per dar impuls en favur d'ina promoziun dall'economia regiunala. Il Parc naziunal ell'Engiadina Bassa e la Biosfera Val Müstair ein buns mussaments ch'in parc procura per in bien svilup e nua che las regiuns pertuccadas profiteschan d'ina creaziun da plivalur.

Sper la zona intensiva da turissem cunzun a S. Catrina ei il Parc Adula ina buna cumpensaziun. Per quei sustegnan era las Pendericulas Mustér in parc naziunal

La vischnaunca da Mustér ha da spiarder nuot cun daventar ella zona circumdonta part dil territori dil Parc Adula. Nus sperein fermamein en in effect positiv dil parc e quei senza augmentar zonas da schurmetg, prescripziuns e directives. Cun daventar part d'in parc naziunal duei la valeta da nossa bellezza cuntrada muntagnarda vegnir augmentada cun motivar indigens e hosps da tgirar ella cun respect e quitau. Duessen nus suenter la fasa d'emprova da diesch onns tuttina haver fatg autras experiencias, havein nus lu aunc adina la pusseivladad da renunziar a noss'appartenenza al Parc Adula.

## Proposta


Sebasond sin las expectoraziuns precedentas


### propona

la suprastanza communal al cussegl da vischnaunca

- a) d'approbar il contract dil parc naziunal per l'emprema fasa da diesch onns da menaschi dil Parc Adula (2018-2027), ils statuts e la participaziun all'Uniun Parc Adula (inclusiv reglament da diever per la zona centrala);
- b) da suttametter la fatschenta conform ad art. 32 al. i alla votaziun all'urna.

Suprastanza communal Disentis/Mustér  
Il president: Il canzlist:

  
Francestg Cajacob

  
Andri Hendry

Disentis/Mustér, ils 7 d'october 2016

me1649\_Parc Adula

La Charta Parc Adula ei exponida ella stanza da spetga nr. 10

- Messadi davart il project naziunal Parc Adula
- Carta zona circumdonta vischnaunca da Mustér